



Il drâc dai siet cjâfs

In tune montagne al jere une volte un drâc ch'al veve siet cjâfs e nissun al podeve lâ lassù parceche senò lui lu mangjave. Il Re al veve fat dî in gîr che cui che lu varès copât al varès maridât la principesse come premi e al varès vude la metât des sôs sostancis.

'A vevin provât tanc' di lôr, ma nissun al jere tornât indaûr vîf par maridâ la principesse e cjapâsi la robe. Une di, finalmentri, al rivà in paîs un cavalîr cul cjaval ros, ch'al veve decidût di lâ su la mont. Dopo un toc ch'al lave vie al galop, al sintì une vôs ch'e vignive sù di un fossâl e ch'e domandave ajût.

«Judaimi! Judaimi!» 'e berlave.

Il cavalîr alore al dismontà dal cjaval e al lé di corse a viodi cui ch'al clamave: tal fossâl 'e jere une vecjute, miege dentri te aghe, dute bagnade.

Il cavalîr, alore, al cjapà la sô mantiline e la slungjà fintremai che la vecjute 'e rivà a ingrampâsi e a tirâsi sù sane e salve.

Lu ringrazià e j domandà indulà ch'al lave. Il cavalîr j contà ch'al veve di lâ su la mont a copâ il drâc dai siet cjâfs. La vecjute, alore, j regalà une spade e j disè: «Cuanche tu rivis denant la cjase dal drâc, tu cjalis dal 'zardin se lui al è dentri, ma cence fâti viodi. Se nol è dentri, tu vâs in cjase e tu ti platis daûr de puarte. Cuanch'al jentre, cu la spade che ti ài dât tu j tais i cjâfs e tu copis daurmàn lis colombis ch'a saltin fûr, parceche senò i cjâfs 'a si tôrnin a riprodusi. Se no tu rivis in timp a copâlu stant daûr de puarte, platiti sot dal jet, ma a man zampe, parceche il drâc al duâr simpri cun tun voli sôl, e chel a man buine al è simpri viart e cussì al ti viodarès».

Il cavalîr nol rivà nancje in timp a ringraziâle che la vecjute 'e jere 'za sparide. Cjamine, cjamine, cjamine, il 'zovin al rivà denant la cjase dal drâc e come che j veve dite la vecjute, stant che dentri nol jere nissun, al lé a platâsi daûr de puarte. Co il drâc al jentrà, il cavalîr nol rivà subit a copâlu e alore al lé a platâsi sot dal jet. Il drâc al cenà, al si sdrondenà un pòc e podopo al lé a durmî.

Co lu sintì ronçea, il 'zovin al saltà fûr di sot il jet, j tajà i cjâfs un daûr chel altri, al copà lis colombis man man ch'a saltavin fûr e cussì il drâc al murì.

Podopo, il cavalîr al lé jù in paîs e al disè ch'al veve copât il drâc, e che nissun al veve di vê plui pore di lâ su la mont. Ma la int 'e stentave a crodi.

Il re alore, ch'al veve avonde coraggio, al decidè di lâ su la mont bessôl, a viodi se la storie 'e jere vere. E dopo vê tant cjaminât al cjatà la cjase dal drâc, cul drâc dentri, muart.

Dut content il Re al tornà in paîs e al visà la int. 'A fasèrin cussì une gran fieste. Il cavalîr al sposà la principesse e al diventà paron di metât robe dal Re. Podopo 'a fasèrin un pastin e un paston, ma a mi no mi lassàrin nancje un bocon.